


Канон великомученице Параскеве (глас 4)



Песнь 1

Ирмос: *Отверзу уста моя, и наполнятся Духа, и слово отрыгну Царице Матери, и явлюся, светло торжествуя, и воспою, радуясь, Тоя чудеса.*

Припев: *Святая великомученице Параскево, моли Бога о нас.*

Светом Божественным осветившись свыше, мрак отжени неразумия моего и подаждь ми молитвами твоими, Параскево, благодать, воспевати твоих, мученице, чудес множества.

Солнца светлейши, яко истинно возсияла еси утро, утверждение Церкви бывши Христовы, озарила еси лучами подвигов, мученице Параскево, твоими чудесы мира концы.

Жениха, Безсмертнаго Христа, возлюбивши, яко верою Того страсти общница показала еси и восприяла еси вечное Царство и венец нетленный, мученице Параскево славная.

Богородичен: Дево Всенепорочная, Христа родившая, и Сего в ложеснах понесла еси, истинноименитая, разреши мрак души моея и просвети мя, да пою Тя.

Песнь 3

Ирмос: *Лук сильных изнеможе, и немощствующи препоясашася силою: сего ради утвердися в Господе сердце мое.*

Палицами немилостивно биема, радовашеся, лыстом сокрушаемым и костью вкупе, приснопамятная мученица Параскева, вопиющи: ничтоже мя разлучит от любви Твоея, Христе.

Уста нечестивых, глаголющая беззаконие на преподобнаго, и язык велеречив заградишася, мученица Параскева вопиаше, Спаса проповедающи.

Кровей твоих кропления безбожия огонь погасила еси, многострадальная мученице Параскево, и верных разумы просветила еси.

Богородичен: Глаголы благочестивно исполняются Исаиины: Дева бо родила есть во плоти Жизнодавца Христа, Спаса душ наших.

Седален

Кровей твоих струями, мученице Христова, потоки нечестия изсушивши, всехвальная Параскево, одождием же благодати словесныя напаяеши бразды, в нихже прозябаеши клас веры. К сему же, славная, и по смерти явилася еси, точащи

жизнь мучения ради, страстотерпице всехвальная. Моли Христа Бога даровати душам нашим велию милость.

Песнь 4

Ирмос: *Седяй в славе на Престоле Божества во облаце легце, прииде Иисус Пребожественный нетленною дланию и спасе зовущия: слава, Христе, силе Твоей.*

Уязвившись любовью Христовою, ополчения мучительская крепостию твоею умертвила еси, благодать источаеши присноживотную: страстей ради мздовоздаяние, восприяла еси, Параскево, мучениц Христовых доброта.

Превозшедши вся любовью Христа, Жениха твоего, плотскую любовь возненавидевши, крепко болезненная страдания претерпела еси, мученице Параскево, вопиющи: не разлучи мене, Христе, от желания Твоего мучения подвиг совершити.

Отвергши мира суету всю, Богу Единому прилепилася еси, Параскево мученице, и болезни страдания претерпевши, невесто Божия, мужеумная.

Богородичен: Сниде, яко дождь на руно, во утробу Твою Господь, якоже рече древле пророк, Всенепорочная, Егоже во двух Существах родила еси, Емуже взываем: слава силе Твоей, Господи.

Песнь 5

Ирмос: *Ты, Господи, мой свет в мир пришел еси, Свет Святый, обращаай из мрачна неведения верою воспевающия Тя.*

Свет незаходимый вселися в души твоей, да добродетелию сияеши, озаряя тебе непрестанно славящия.

Струю, мученице Параскево, нечестиваго безбожия изсушила еси: течении кровными, неправедно проливаемыми, огонь прелести погасила еси.

Ум имущи прозрачен, пророческаго дара сподобилася еси, хотящая быти всем яве предглаголала еси, Параскево многострадальная.

Богородичен: Мати Божия, души моя злобу исцели, родившая Бога Слова неизреченно. Сего ради вси роди блажат Тя.

Песнь 6

Ирмос: *Пожру Ти со гласом хваления, Господи, Церковь вопиет Ти, от бесовския крове очищися, ради милости от ребр Твоих истекшею Кровию.*

Возсияла из Рима, яко солнце светлое, святая мученице, мрак демонский от человек отгоняющи мольбами твоими, Параскево многострадальная.

Исцеления приемлют приходящие прикосновением к раце мощей твоих, кровоточивии и прокаженнии очищаются, отбегают демонския полки, призыванием святаго твоего имени.

Утреневала еси ко Христу, невечернему Солнцу, и Того светлостью души, Богомудрая, и сердце озарила еси, Параскево честная, и к Свету Троическому, радуясь, прешла еси.

Богородичен: Исцели души моя страсти, Всенепорочная, безстрастия рождшая Источник, и отжени томительство, непрестанно смущающее сердце мое.

Кондак, глас 3

Всесвятое и непорочное мучение принеши, яко вено пречестное, безсмертному Жениху Христу, Ангельское ликостояние возвеселила еси и победила еси демонския козни. Сего ради ты честно верою чтим, мученице Параскево многотрадальная.

Икос

Кто изглаголет силы Господня; или кто повесть страдания твоя и добродетели, мученице; или кий язык воспети возможет по достоинству. Темже и аз, недостойный, воспети покушаюся, хвалити же и славити Владыку Жизнодавца, давшего тебе на тризнице крепость мучителей не убоиться, исповедающей Истиннаго Бога. Сего ради ты чтим верою и любовию, мученице Параскево многотрадальная.

Песнь 7

Ирмос: *Спасый во огни Авраамския Твоя отроки, и халдеи убив, яже правда праведно уловляше, препетый Господи, Боже отец наших, благословен еси.*

Голубице, крила имущи золотая и оружием хранима крестным, агаряны же, в нощи граду твоему приближившияся, отгнала еси, спасши верныя от убийства, мученице Параскево, поющия: препетый отец наших Боже, благословен еси.

Многообразныя болезни претерпевши Христа ради, мученице Параскево, неболезненный у Него обрела еси покой и, радующися, зываеши: препетый отец наших Боже, благословен еси.

Коль непобедим твой разум, Параскево честная, яко от начальников лика мучителей мук не убоялася еси. С нимиже бравшияся, скончалася еси яко служительница тайны Божественныя славы, поущи: препетый отец наших Боже, благословен еси.

Богородичен: Благословен Плод благословеннаго Твоего чрева, Егоже благословят Небесныя Силы и человечестии собори восхваляют, нас избавльшаго

клятвы древняя, Благословенная, поющих: препетый отец наших Боже, благословен еси.

Песнь 8

Ирмос: *Отроки благочестивыя в пеци Рождество Богородичо спасло есть, тогда убо образуемое, ныне же действуемое, вселенную всю воздвизает пети Тебе: Господа пойте дела и превозносите Его во вся веки.*

Божественными светлостми Солнца мысленного просветившись, мученице всехвальная Параскево, ночь претекла еси безбожия, поющи единомыслием души: Господа воспевайте дела и превозносите Его во веки.

Яко агница, яко нескверная юница, яко Божественная голубица, яко самовольное заколение, привелася еси, мученице Параскево, Зиждителю твоему и, яко жертва непорочна, принеслася еси, согласно поющи: Господа пойте дела и превозносите Его во веки.

Светлу себе от кровей ризу мучением обложила еси, Параскево, добляя мученице, совлекшись истинно тленного со грехи человека, радостно воспеваючи: Господа пойте дела и превозносите Его во веки.

Богородичен: Во след Тебе текоша жены, мира сладковоннаго ведуще, Всечистая Богоневесто, Едина Неискусобрачная, из утробы Твоя возсиявшаго Единороднаго Сына, Христа Бога, и с Тобою царствуют истинно, песнословяще Его во веки.

Песнь 9

Ирмос: *Всяк земнородный да възиграется, Духом просвещаем, да торжествует же Безплотных умов естество, почитающее священное торжество Богоматере, и да вопиет: радуйся, Всеблаженная Богородице, Чистая Приснодево.*

В Небесный чертог всельшись, дево Параскево всечестная, и невидимых доброт разумно насладившись, восприимши неизреченную светлость, просвети поющия и величающия тя.

Венец восприяла еси на главе твоей, Параскево доблеумная, яко скончавши течение и сохранивши веру непоколебиму, праведных чини радостно ты прияша. Тем ныне ублажаем тя.

Подаеши исцелений капли требующим, яко от источника, всебогатая мученице Параскево, уставляющи токи недугов и страстей отгонящи зной, сердца благочестивых напаяющи ко благоплодию Божественных деяний.

Богородичен: Мудрости Вместилище, паче ума лучшаго, явилася еси, Отроковице Всенепорочная, одушевлен же престол и дверь. Тем яко Царицу Ты возлюбльше, девы во след Тебе приведошася, Богоотроковице.

Светилен

Яко шипок краснейший от терновнаго прозябла еси корене, дево Параскево, оброшением, мученице, священнаго страдания обagrившися кровию. И ныне Божественную твою память творящия любовию спасай ны от бед.